


唐揚州大雲寺

鑑真傳

——高僧傳卷十四

釋鑑真；姓淳于氏，廣陵江陽縣人也，總卯俊明，器度宏博，能典謁矣，隨父入大雲寺見佛像，感動夙心，因白父求出家，父奇其志許焉。登便就智滿禪師循其獎訓，唐天后長安元年詔於天下度僧，乃爲息慈，配住本寺，後改爲龍興。迨中宗孝和帝神龍元年，從道岸律師受菩薩戒，景龍元年詣長安，至二年三月二十八日，於實際寺依荊州恆景律師邊得戒，雖新發意，有老成風，觀光兩京名師陶誘，三藏教法數稔該通。動必研幾，曾無矜伐，言旋淮海以戒律化誘，蔚爲一方宗首，冰池印月適足清明，猊座揚音良多响答。時日本國有沙門榮叡普照等，東來募法用補缺然，於開元年中達於揚州，爰來請問，禮真足曰，我國在海之中，不知距齊州幾千萬里，雖有法而無傳法人，譬猶終夜有求於幽

室，非燭何見乎，願師可能輟此方之利樂，爲海東之導師乎。真觀其所以察其翹勤，乃問之曰：昔聞南岳思禪師生彼爲國王，興隆佛法，是乎？又聞彼國長屋會造千袈裟來施中華名德，復於衣緣繡偈云：「山川異域，風月同天，寄諸佛子，共結來緣」，以此思之，誠是佛法有緣之地也，默許行焉，所言長屋者，則相國也。真乃募比丘思託等一十四人，買舟至廣陵賈經律法離岸，乃天寶二載六月也。至越州浦，止署風山，真夜夢甚靈異，纔出洋遇惡風濤，舟人顧其垂沒，有投棄棧香木者，聞空中聲云：勿投棄，時見舳艫各有神將介甲操仗焉，尋時風定，俄漂入蛇海，其蛇長三丈餘，色若錦文，後入魚海，魚長尺餘，飛滿空中，次一洋，純見飛鳥，集於舟背壓之幾沒，泊出鳥海乏水，俄泊一島，池且泓澄，人飲甘美，相次達於日本，其國王歡喜迎入城大寺安止。初於盧遮那殿前立壇，爲國人受菩薩戒，次夫人王子等，然後教本土有德沙門足滿十員，度沙彌澄修等四百人，用白四羯磨法也。又有王子一品親田捨宅造寺，號招提，施水田一百頃，自是已來長敷律藏，受教者多，彼國號大和尚，傳戒律之始祖也。以日本天平寶字七年癸卯歲（公元七六三年），五月五日無疾辭象坐亡，身不傾壞，乃唐代宗廣德元年矣。春秋七十有七，至今其身不施苧漆，國王貴人信士時將寶香塗之，僧思託著東征傳詳述焉。



揚州法淨寺——創建於劉宋孝武帝大明年間（四五七—四六五），稱大明寺，隋建棲靈塔，故亦稱棲靈寺，清乾隆三十年（一七六五）改稱法淨寺。